

366 DE CVLTV DEO IN DIE DOMINICA
tinacia, & quod incorrigibiles, orandum potius pro conversione eorum, sicut Christus oravit pro hostibus Luc. XXIII, 34. Stephanus Act. VII, 67.

§. 6. Dic. 4. Personæ publicæ licite orare possunt contra hostes publicos, ita David oravit contra hostes suos Ps. XXXV, 1. *Impugna Domine impugnantes me, & Paulus contra Pseudo-Apostolos, utinam abscindantur, qui vos labefaciunt.*

§. 7. Denique monendum, quod exempla eorum in sacris literis, qui contra personas hostium orarunt, non facile ad imitationem trahenda sint, cum enim v. g. David, Paulus contra personas hostium orarunt, certi fuerunt, hostes plane incorrigibiles, & pœnæ divinæ destinatos esse, unde imprecationes eorum non tam fuerunt preces, quibus male hostibus esse vellent, quam prophetiæ de iis, quæ impiis eventura erant.

TITVLVS SEPTIMVS

DE

Cultu Deo in die Dominica aut

Festis exhibendo.

CASVS I.

AN in die Dominica vel Festo concedi possint exercitia palæstrica, jaculationes & similia?

§. 1.

Non est quæstio de die Sabbathi aut festo quoad illud tempus, quo sacra publica peraguntur, hîc enim extra controversiam positum est, aliis exercitiis, quocunque veniunt nomine, locum non esse concedendum, præferendum enim est exercitium Deo sacrum, quando scilicet verbum prædicatur & auditur, sacramenta administrantur, Deus sanctis cantionibus celebratur.

§. 2. Sed quæstio est de parte diei Dominici aut festi, post cultum Dei publicum, ubi sacra publica finita, an ea parte diei concedi possint exercitia palæstrica, jaculationes, ludi, comædiæ & similia exercitia? ubi non una est sententia, alii affirmativam, alii negativam amplectuntur.

§. 3. Si absolute hæc quæstio consideretur, dicendum omninò, quod rectius agant, qui etiam post cultum publicum, reliquam
diei